

La biblioteca l'é cultura

La festa si 30 egn de attività con apuntament leterèrs de gran enteress

Cianacei - Va inant l program per i 30 egn de la biblioteca de Cianacei coi desvalives apuntamenc col mond di libres e con autores cognosciui. Dò la bela scontrèdes de messèl col scrittor e alpinist Kurt Diemberger e co la autora da Roveredo Isabella Bossi Fedrigotti, subito dò la Madonna d'aost sarà amò doi momenc de prejentazion de libres.

En mèrcol ai 19 de aost da les 17.30 aló da la sala picola del chino Marmolèda, Loredana Reppucci prejentará sie liber dal titol "Intrigo inquietante" che à tout pèrt ence a la Fiera del Liber de Torin a la fin de mé de chest an. Loredana Reppucci à vivù per egn te la Val de Fiem, la laora tel ciamp scientifich e apontin chest liber reiona de certa situaziuns sozedudes ti laboratories de enrescida e tel mond scientifich. Argoments che à trop a che fèr con nosc modo de viver de anchecondi.

En domenica ai 23 de aost enveze te piaz de Cianacei Azad Vartanian, n scrittor talian che à firmà l liber con sie inom armen, prejentará sia publicazion dal titol "Masis-Ararat La madre degli Armeni". Se rejonerà apontin de chest mond sacro per i armens ence se anchecondi i se troa te tera turca. Chest apuntament l'é stat endrezà ence per encontentèr chela sort de publich che aessa volù scontrèr la

gran scrittora Antonia Arslan ma che no à podù tor pèrt per grieves problemes de sanità.

En mèrtesc al prum de setember n auter apuntament de gran valuta sarà chel con l scrittor arbëreshe (mendranza de lengaz albaneis de la Tèlia) Carmine Abate, nasciù te la Calabria ma che vif a Roveredo, prejentará sie ùltim liber "Gli anni veloci" olache vegn rejonà ence di gregn artisè de la cianzon talièna Lucio Battisti e Rino Gaetano che fèsc pèrt del patrimoine discografich de la generaziuns di egn '70 e '80. Apede a la prejentazion del liber sarà ence da scutèr n bel concert de n grop de pascioné de mùsega de Mori che portará dant ence cianties di doi autores taliegn.

E amò via per de november l'autor Giampiero Girardi da Trent prejentará n documentarie sul Camino de Compostela e per fenir sarà na scontrèda sun n om todesch che se à remì contra Hitler: na bela storia de na persona che per i valores morai se à batù ence a descapit de sia familia. Sarà l'ocajon per descoriger la gran emportanza di valores e de la morala desche fondament del viver. Se sà ben che duta la jent vegn envièda de cher a tor pèrt per festejèr chisc trenta egn de la majon di libres de Cianacei.

Domenico Volcan Terla